

Na osnovu člana IV 4.a) Ustava Bosne i Hercegovine, Parlamentarna skupština Bosne i Hercegovine, na 77. sjednici Predstavničkog doma održanoj 13. aprila 2006. godine, i na 57. sjednici Doma naroda održanoj 13. aprila 2006. godine, usvojila je

## **ZAKON**

### **O IZMIRENJU OBAVEZA PO OSNOVU RAČUNA STARE DEVIZNE ŠTEDNJE**

#### **NESLUŽBENI PREČIŠĆENI TEKST**

**(“Službeni glasnik BiH”, br. 28/06, 76/06 i 72/07)**

#### **DIO PRVI - OPŠTE ODREDBE**

##### **Član 1.**

(1) Ovim Zakonom uređuje se postupak, način i rokovi izmirenja obaveza Bosne i Hercegovine po osnovu računa stare devizne štednje deponovane u domaćim bankama na teritoriji Bosne i Hercegovine.

(2) Za izmirenje obaveza po osnovu računa stare devizne štednje odgovorna je Bosna i Hercegovina, a sredstva obezbjeđuju Federacija Bosne i Hercegovine, Republika Srpska (u daljnjem tekstu: entiteti) i Brčko Distrikt Bosne i Hercegovine (u daljnjem tekstu: Distrikt).

(3) Osiguranje sredstava za nesmetano izmirenje obaveza po osnovu računa stare devizne štednje neće biti uslovljavano preraspodjelom sredstava javne potrošnje niti rebalansom budžeta.

(4) U svrhu iznalaženja mogućnosti osiguranja dodatnih sredstava za izmirenje obaveza po osnovu računa stare devizne štednje, ministarstva finansija entiteta i Distrikta redovno će sagledavati stanje budžeta i iznalaziti mogućnost preraspodjele eventualnog viška sredstava budžeta s ciljem povoljnijih uslova povrata stare devizne štednje.

(5) Obezbjedenje sredstava u skladu sa stavom (2) ovog člana zasniva se na lokaciji svakog depozita u banci ili njenim filijalama ili najnižim operativnim jedinicama koje su poslovale na teritoriji entiteta i Distrikta u kojima je deponovana devizna štednja.

(6) U osiguranju sredstava iz stava (2) ovog člana učestvuje i Bosna i Hercegovina iz raspoloživih sredstava po osnovu sukcesije bivše SFRJ i drugih raspoloživih sredstava, a Savjet ministara Bosne i Hercegovine svojom odlukom utvrđuje iznos i način korišćenja ovih sredstava.

(7) Izmirenju obaveza Bosne i Hercegovine u smislu st. (1) i (2) ovog člana prethodi postupak verifikacije

potraživanja.

## **Član 2.**

(1) U smislu ovog Zakona, pod računima stare devizne štednje podrazumijevaju se devizna sredstva kod banaka na teritoriji Bosne i Hercegovine, sa stanjem na dan 31.12.1991, uključujući kamatu obračunatu do tog datuma, a umanjena za direktne isplate banke nakon tog datuma, za prenesena i iskorišćena sredstva sa jedinstvenog računa u Federaciji Bosne i Hercegovine i jedinstvenog privatizacijskog računa u Republici Srpskoj i Distriktu, i za eventualne isplate poslije 31.12.1991. po bilo kojem drugom osnovu.

(2) Računi stare devizne štednje definisani stavom (1) ovog člana ne obuhvataju račune stare devizne štednje u filijalama Ljubljanske banke, Invest banke i drugih stranih banaka na teritoriji Bosne i Hercegovine.

(3) Obaveza vraćanja duga sa deviznih računa i deviznih štednih uloga, iz stava (2) ovog člana, zaključenih sa bankama čije je sjedište bilo van teritorije Bosne i Hercegovine, prema Sporazumu o sukcesiji, obaveza je države, sljednice bivše SFRJ, na čijoj teritoriji se nalazilo sjedište te banke. Bosna i Hercegovina obavezuje se da će, kroz svoje međunarodne aktivnosti, pomoći štedišama koje imaju štednju kod ovih banaka da ostvare svoja prava, najmanje jednako kao i štediše kod banaka čije se sjedište nalazilo na teritoriji Bosne i Hercegovine.

## **Član 3.**

(1) Na osnovu preliminarних podataka banaka sa sjedištem u Bosni i Hercegovini, u smislu člana 2. stav (1), stanje stare devizne štednje iznosi 1.979.000.000 KM. Konačno stanje štednje utvrdiće se nakon završetka postupaka verifikacije za svakog pojedinačnog štedišu u zbirnom iznosu.

(2) Štediše koje su trećem licu prodale certifikate po osnovu računa stare devizne štednje u Federaciji Bosne i Hercegovini, ili koje su prodale vaučere po osnovu računa stare devizne štednje u Republici Srpskoj nemaju pravo da podnose zahtjev za verifikaciju u skladu sa ovim Zakonom.

(3) Kupci certifikata po osnovu računa stare devizne štednje u Federaciji Bosne i Hercegovini ili kupci vaučera po osnovu računa stare devizne štednje u Republici Srpskoj i Distriktu navedene certifikate ili vaučere mogu koristiti samo u procesu privatizacije i nemaju pravo da podnose zahtjev za verifikaciju u skladu sa ovim Zakonom.

## **Član 4.**

Obračunata i neisplaćena kamata prema ugovorima iz člana 1. stava (1) nakon 01.01.1992. godine se stornira i od istog datuma, pa do stupanja na snagu ovog Zakona, vrši se novi obračun kamata po stopi od 0,5%.

## **DIO DRUGI - VERIFIKACIJA**

### **GLAVA I -OPŠTI PRINCIPI**

#### **Član 5.**

Obaveze po osnovu računa stare devizne štednje kojeiz opravdanih razloga nisu verifikovane u skladu sa odredbama ovog Zakona i propisima o sprovođenju entiteta i Distrikta mogu se u skladu sa ovim zakonom dokazivati i ostvarivati samo u sudskom postupku.

#### **Član 6.**

(1) Verifikacija predstavlja neophodan postupak kojim se identifikuju potražioc, vrši provjera iznosa računa stare devizne štednje svakog potražioca i registruju sva potraživanja po osnovu računa stare devizne štednje, čime se potvrđuju, a ne redefinišu i ne raskidaju postojeća prava.

(2) Po okončanju verifikacije, potražilac dobija potvrdu o verifikaciji koja identifikuje potražioca i verifikuje iznos računa stare devizne štednje.

(3) Potvrda iz stava (2) ovog člana predstavlja osnovu za izmirenje potraživanja po osnovu računa stare devizne štednje i izdaje se u obliku formulara koje propisuju entiteti i Distrikt, a uključuje i sljedeće:

a) svaki pojedinačni račun i verifikovani iznos;

b) identitet vlasnika;

c) naziv banke i broj računa na koji će biti izvršena gotovinska isplata i isplate po osnovu emitovanih obveznica iz člana 18. ovog Zakona.

(4) Ako potražilac raspolaže sa više računa, svi računi pojedinačno se verifikuju i iznosi sabiraju. Svaki pojedinačni potražilac dobija samo jednu potvrdu o verifikaciji na području jednog entiteta, odnosno Distrikta.

#### **Član 7.**

(1) Verifikaciju računa stare devizne štednje, u skladu sa odlukama vlada entiteta i Skupštine Distrikta, vršiće:

- a) Agencija za posredničke, informatičke i finansijske usluge A.D. Banja Luka - za Distrikt;
- b) Agencija za posredničke, informatičke i finansijske usluge A.D. Banja Luka - za Republiku Srpsku;
- c) Agencija za finansijske, informatičke i posredničke usluge D.D. Sarajevo - za Federaciju Bosne i Hercegovine; i
- d) Agencija za pružanje finansijskih, informatičkih i posredničkih usluga Mostar - za Federaciju Bosne i Hercegovine (u daljnjem tekstu: Agencije).

(2) U roku od 15 dana od dana stupanja na snagu ovog Zakona, Agencije će razmijeniti baze podataka za sve depozite po osnovu računa stare devizne štednje, čija se izmirenja, u skladu sa ovim Zakonom, vrše u drugom entitetu ili Distriktu.

#### **Član 8.**

(1) U postupku verifikacije računa stare devizne štednje, banke, Agencija za privatizaciju Federacije Bosne i Hercegovine, te druge institucije entiteta i Distrikta koje raspolažu podacima bitnim za verifikaciju računa stare devizne štednje, dužne su da sarađuju sa entitetskim ministarstvima finansija i Direkcijom za finansije Distrikta, agencijama i komisijama i dostave im sve podatke relevantne za postupak verifikacije.

(2) Institucije iz stava (1) ovog člana dužne su da svoje baze podataka provjere i uredе ih tako da se kao autentične mogu koristiti u postupku verifikacije, a posebno da iskažu podatke o kamatama koje se odnose na period do 31.12.1991. godine i period poslije tog datuma.

#### **Član 9.**

(1) Kao dio postupka verifikacije računa stare devizne štednje, entitetska ministarstva finansija i Direkcija za finansije Distrikta objaviće poziv za verifikaciju računa stare devizne štednje u najmanje dva dnevna lista dostupna na cijeloj teritoriji Bosne i Hercegovine i na internetu, i to najmanje tri puta do isteka roka za predavanje zahtjeva za verifikaciju.

(2) Prvo objavljivanje poziva za verifikaciju biće izvršeno u roku od 15 dana nakon stupanja na snagu ovog Zakona, a zatim svaka dva mjeseca do isteka roka za podnošenje zahtjeva za verifikaciju.

(3) Ministar spoljnih poslova će takođe poslati pozive za verifikaciju svim ambasadama i konzulatima Bosne i Hercegovine, sa instrukcijom za odgovarajuće objavljivanje u tim zemljama.

## **Član 10.**

U postupku verifikacije računa stare devizne štednje Agencije su dužne da:

- a) izvrše verifikaciju računa stare devizne štednje u skladu sa ovim Zakonom;
- b) izdaju potvrdu svakom potražiocu o zaprimljenom zahtjevu za verifikaciju i dokumentaciji iz člana 12. ovog Zakona (u daljnjem tekstu: zahtjev);
- c) uspostave, redovno ažuriraju i održavaju Registar računa stare devizne štednje (u daljnjem tekstu: Registar) za svakog potražioca, uključujući podatke o stanju verifikovanih računa stare devizne štednje nakon izvršenog otpisa kamate, iznosu otpisane kamate, prometu prije okončanja postupka verifikacije i održavaju sve bankovne informacije neophodne za izmirenje potraživanja prema ovom Zakonu;
- d) izrade i realizuju potrebne bezbjednosne postupke kojima se pruža zaštita i obezbjeđuje cjelovitost podataka koji se vode u Registru;
- e) obezbijede formiranje posebne baze podataka računa stare devizne štednje prema: filijalama i organizacionim jedinicama koje su egzistirale na teritoriji entiteta i Distrikta, u kojoj se utvrđuju svi potražioc i iznosi svih potraživanja;
- f) formira bazu podataka spornih potraživanja;
- g) izda potvrdu o verifikaciji iz člana 6. ovog Zakona;
- h) nakon izvršene verifikacije u skladu sa ovim Zakonom verifikuje deviznu štednu knjižicu odgovarajućim pečatom;
- i) redovno obavještava entitetska ministarstva finansija i Direkciju za finansije Distrikta o izvršenoj verifikaciji;
- j) formira arhivu o izvršenoj verifikaciji računa stare devizne štednje;
- k) obavlja druge poslove u skladu sa ovim Zakonom i pojedinačno zaključenim ugovorima sa entitetskim ministarstvima finansija i gradonačelnikom Distrikta.

## **GLAVA II - POSTUPAK PODNOŠENJA ZAHTJEVA**

## **Član 11.**

Potražilac je dužan da lično ili preko ovlašćenog punomoćnika preda zahtjev za verifikaciju računa stare devizne štednje neposredno u poslovnoj jedinici odgovarajućih agencija u mjestima filijala banaka ili najnižih operativnih jedinica banaka u entitetima ili Distriktu gdje su računi stare devizne štednje bili deponovani, ili u mjestima koja su najbliža tim mjestima.

## **Član 12.**

(1) Za potrebe verifikacije računa stare devizne štednje, potražilac stare devizne štednje dužan je da lično ili preko ovlaštenog punomoćnika podnese Agencijama sljedeću dokumentaciju:

- a) zahtjev za verifikaciju računa stare devizne štednje;
  - b) originalnu deviznu štednu knjižicu potražioca ili drugu originalnu bankovnu dokumentaciju, ugovor ili karticu kojom je račun stare devizne štednje otvoren;
  - c) pravosnažno sudske rješenje o nasljeđivanju, ako je račun stare devizne štednje stečen nasljeđivanjem;
  - d) ličnu kartu ili pasoš potražioca;
  - e) rodni list za maloljetne potražioce;
  - f) punomoć ovjerenu kod nadležnog organa u slučaju kada punomoćnik djeluje u ime potražioca;
  - g) ličnu kartu ili pasoš punomoćnika;
  - h) pravovaljan darovni ugovor ako je račun stare devizne štednje poklonjen drugom licu;
  - i) sve ostale dokumente koji mogu pomoći verifikaciji, uključujući račune, fakture, ili neke druge dokumente u kojima je evidentiran iznos ili vlasništvo nad računima stare devizne štednje.
- (2) Ako je originalna devizna štedna knjižica izgubljena ili uništena ili potražilac ne posjeduje jedan ili više dokumenata iz stava (1) ovog člana, potražilac ima pravo da podnese zahtjev za verifikaciju i druge dokumente ili dokaze kojima će dokazati pravo na račun stare devizne štednje.
- (3) Zahtjev za verifikaciju računa stare devizne štednje podnosi se na obrascima propisanim entitetskim i propisima Distrikta o sprovođenju.

## **Član 13.**

Zajedno sa zahtjevom za verifikaciju, Agencijama se mora dostaviti dokumentacija koja na zadovoljavajući način identifikuje potražioca:

- a) u slučaju smrti korisnika računa, potraživanje po osnovu računa stare devizne štednje može se naslijediti i dokazati podnošenjem pravosnažne sudske odluke o nasljeđivanju;
- b) ako se račun stare devizne štednje pokloni drugom licu, potraživanje se dokazuje podnošenjem pravovaljanog darovnog ugovora; i

c) ako ovlašćeni punomoćnik djeluje u ime potražioca ili ako preuzima gotovinsku isplatu u ime potražioca, Agencijama se mora dostaviti originalna ovjerena punomoć koju Agencije zadržavaju.

### **GLAVA III - AGENCIJSKA VERIFIKACIJA POTRAŽIVANJA**

#### **Član 14.**

(1) Potražilac mora podnijeti zahtjev za verifikaciju računa stare devizne štednje u roku propisanom u članu 17. ovog Zakona, a uz zahtjev podnosi i svoju originalnu dokumentaciju i deviznu štednu knjižicu.

(2) Agencije registruju zahtjev i dodjeljuju jedinstveni identifikacioni broj za svaki zahtjev, zatim ovjeravaju zahtjev za verifikaciju, a potražiocu predaju ovjerenu kopiju zahtjeva za verifikaciju. Ovjerena kopija zahtjeva za verifikaciju predstavlja potvrdu o podnesenom zahtjevu.

(3) Sve originalne dokumente, osim devizne štedne knjižice, i dokumentacije iz člana 12. ovog Zakona Agencije kopiraju i vraćaju potražiocu u vrijeme podnošenja zahtjeva. Agencije mogu zadržati deviznu štednu knjižicu do završetka verifikacije. Potražilac ima pravo da dostavi ovjerenu kopiju kompletne devizne štedne knjižice Agencijama, a da zadrži originalnu deviznu štednu knjižicu.

(4) Poslije završetka postupka verifikacije, ako je potraživanje odobreno, potvrdu o verifikaciji iz člana 6. ovog Zakona izdaju Agencije, a devizna štedna knjižica ovjerava se i vraća potražiocu.

#### **Član 15.**

(1) Nakon podnošenja zahtjeva, Agencije blagovremeno vrše provjeru ispravnosti podataka iz dokumentacije koju je dostavio potražilac u skladu sa članom 12. ovog Zakona.

(2) Agencije vrše verifikaciju pojedinačnih zahtjeva upoređujući ih koliko god je to moguće sa informacijama koje su obezbijedile banke u skladu sa članom 8. ovog Zakona. Ako se zahtjev ne može verifikovati u bazi podataka, Agencije vrše verifikaciju na osnovu podnesenih dokumenata iz člana 12. ovog Zakona.

(3) Ako Agencije utvrde da nedostaje neki od podataka, odnosno dokument na osnovu kojeg se nesumnjivo utvrđuje stvarno stanje računa stare devizne štednje, Agencija traži, u pisanoj formi, od potražioca ili ovlašćenog punomoćnika da dodatne podatke, odnosno dokumente, dostavi u roku od 30 dana, ali svakako ne nakon roka za podnošenje zahtjeva za verifikaciju definisanog u članu 17. ovog Zakona.

(4) Ako po isteku roka Agencije ne dobiju tražene podatke, odnosno dokumente, ili ako uz dobijene podatke, odnosno dokumente, nije moguće utvrditi identitet potražioca ili izvršiti verifikaciju iznosa potraživanja po osnovu računa stare devizne štednje, Agencije odbijaju zahtjev za verifikaciju.

(5) Nakon završetka postupka verifikacije svakog pojedinačnog potraživanja, Agencije su dužne da u pisanoj formi obavijeste potražioca o tome da li je zahtjev odobren ili odbijen.

(6) Protiv odluka Agencija dopuštena je žalba potražioca Komisiji za verifikaciju računa stare devizne štednje (u daljnjem tekstu: Komisija) kao drugostepenom organu u postupku verifikacije u entitetima i Distriktu. Odluka Komisije je konačna i obavezujuća i protiv nje se ne može izjaviti žalba, ali se može pokrenuti upravni spor pred nadležnim sudom.

(7) Rješavajući u postupku verifikacije računa stare devizne štednje, Agencije i Komisija su dužni da postupaju po zakonu o upravnom postupku entiteta i Distrikta.

## **Član 16.**

Entiteti i Distrikt uspostaviće najmanje po jednu komisiju. Komisije imaju pet članova koje imenuju entitetske vlade i Skupština Distrikta. Komisije imaju najmanje jednog člana iz entitetskih ministarstava finansija i Direkcije za finansije Distrikta, jednog člana iz entitetskih ministarstava pravosuđa i Pravne kancelarije Distrikta, a ostala tri člana imenuju se prema odluci entitetskih vlada i Skupštine Distrikta. Entitetske vlade i Skupština Distrikta mogu imenovati dodatne komisije u zavisnosti od broja uložених žalbi.

## **Član 17.**

(1) Rok za podnošenje zahtjeva za verifikaciju računa stare devizne štednje je najmanje šest mjeseci od početka postupka verifikacije u skladu sa propisima za sprovođenje entiteta i Distrikta, dok su agencije dužne da završe postupak verifikacije u roku od dvanaest mjeseci od navedenog početka verifikacije.

(2) Izuzetno od odredaba stava (1) ovog člana, utvrđuje se dodatni rok za podnošenje zahtjeva za verifikaciju u trajanju od mjesec dana, koji će se završiti najkasnije do 30. septembra 2007. godine, a agencije su dužne da završe postupak verifikacije najkasnije do 15. decembra 2007. godine.

(3) Verifikacija izvršena do dana stupanja na snagu ovog Zakona prihvata se kao pravovaljana u smislu ovog Zakona.

## **Član 18.**

(1) Svaki 60 dana tokom postupka verifikacije, entiteti i Distrikt objavljujuće saopštenja sa identifikacionim brojem svakog pojedinačnog odobrenog zahtjeva spremnog za gotovinsku isplatu i to u službenim glasilima i dvoje dnevnih novina.

(2) Ako je verifikacija pojedinačnih zahtjeva završena i potražilac se slaže sa iznosom koji su Agencije

verifikovale, potražilac mora potpisati potvrdu o verifikaciji. Potražiocu se, nakon što potpiše izjavu da se odriče prava na žalbu, isplaćuje maksimalan iznos od 100 KM ili ukupan iznos potraživanja do 100 KM. Po završetku postupka verifikacije, Agencije pripremaju spisak svih verifikovanih zahtjeva i iznosa.

(3) Pored toga, svakom pojedinom potražiocu evidentiranom u Registru se, nakon podnošenja potvrde o verifikaciji, isplaćuje maksimalan iznos od 1.000 KM ili ukupan iznos potraživanja do 1.000 KM, koji uključuje i isplaćeni iznos u skladu sa stavom (2) ovog člana, i to do kraja 2007. godine, a ostatak neisplaćenih potraživanja izmiruje se putem obveznica u skladu sa ovim Zakonom. Agencije, na potvrdu o verifikaciji, unose iznos izvršenog plaćanja do 1.000 KM i obračunati ostatak neisplaćenih potraživanja koji će biti izmiren putem obveznica. Potražilac mora Agencijama dostaviti podatke o nazivu svoje banke i broju bankovnog računa koje Agencije unose na potvrdu o verifikaciji i u svoje registre.

(4) Gotovinska isplata iz st. (2) i (3) ovog člana vršiće se po postupku i na način propisan entitetskim i propisima Distrikta o sprovođenju.

(5) Obaveze po osnovu računa stare devizne štednje koje nikada nisu bile preračunate preračunavaju se u KM po srednjem zvaničnom kursu Centralne banke Bosne i Hercegovine (u daljnjem tekstu: Centralna banka) na dan stupanja na snagu ovog Zakona. Kao datum konverzije već preračunatih računa stare devizne štednje uzimaće se datum kada je izvršeno preračunavanje.

## **Član 19.**

(1) Agencije evidentiraju iznos računa stare devizne štednje verifikovan u Registru.

(2) Svakom potražiocu Agencije izdaju potvrdu o verifikaciji.

(3) Nakon završetka postupka verifikacije, računi stare devizne štednje verifikovani u skladu sa ovim Zakonom umanjuju se za taj dio obaveza koji se izmiruje isplatom u gotovini i evidentira u Registru i upisuje u potvrdu o verifikaciji iz stava (2) ovog člana.

## **Član 20.**

(1) Agencije su takođe dužne da održavaju registar spornih potraživanja koji uključuje sva potraživanja koja su kao sporna upućena na Komisije, kao i sve slučajeve pred sudovima. Ovaj spisak uključuje podatke o identifikaciji lica koje potražuje račune stare devizne štednje, identifikaciji informacija o računu na koji je štednja položena i iznos uloga.

(2) Poslije donošenja konačne odluke, Komisija dostavlja kopiju svoje odluke Agencijama, nakon čega slijedi postupak po odredbama člana 18. ovog Zakona.

## **Član 20a.**

(1) S ciljem rješavanja neusaglašenih stavova po pitanju lokacije obaveza u skladu sa stavom (3) člana 1. ovog zakona, Savjet ministara Bosne i Hercegovine imenovaće posebnu komisiju.

(2) Komisija iz stava (1) ovog člana sastavljena je od predstavnika entiteta i Distrikta na paritetnoj osnovi i jednog predstavnika Savjeta ministara Bosne i Hercegovine.

## **DIO TREĆI - EMISIJA OBVEZNICA**

### **Član 21.**

(1) Obaveze koje nisu isplaćene u gotovini, u skladu sa članom 18. ovog Zakona, izmiruju se putem obveznica. Obveznice će se emitovati u elektronskoj formi, istovremeno, i to u roku od 90 dana od dana posljednje gotovinske isplate u skladu sa članom 18. stav (3) ovog Zakona, a najkasnije do 31. marta 2008. godine, pod sljedećim uslovima:

a) rok dospijeaća do devet godina, a najkasnije do 31.12.2016. godine, s tim što će se raspored po godinama dospijeaća obveznica utvrditi odlukom Savjeta ministara Bosne i Hercegovine;

b) godišnja kamata od 2,5%;

c) mogućnost prijevremenog otkupa.

(2) Konačan iznos obveznica za entitete i Distrikt utvrđuje se nakon završetka postupka verifikacije u skladu sa ovim Zakonom.

### **Član 22.**

(1) Potvrda o verifikaciji sadrži evidenciju iznosa obveznica koje treba emitovati svakom potražiocu. Iznosi navedeni u potvrdama o verifikaciji zajedno sa imenom, adresom, bankom i brojem bankovnog računa svakog potražioca, kao i bilo koja dodatna informacija koja može biti potrebna, unose se u zvanični registar vlasništva obveznica koji vodi Centralna banka. U vrijeme emitovanja obveznica, iznos obveznica će odražavati vrijednost KM valute prema EUR valuti i to po zvaničnom kursu Centralne banke na dan emitovanja. Centralna banka, putem banke iz člana 6. stav (3) ovog Zakona, izdaje potvrdu u papirnoj formi koja potvrđuje vlasništvo nad obveznicom za svakog nosioca tog prava. Ova potvrda sadrži evidenciju emisije obveznica za vlasnika obveznice. Nakon toga, obveznice će biti u formi elektronskog zapisa i u potpunosti prenosive.

(2) Agencije su dužne da sarađuju, kao i da Registar i samu bazu podataka učine dostupnim zvaničnom registru Centralne banke.

### **Član 23.**

- (1) Obveznice emituje Bosna i Hercegovina u ime entiteta i Distrikta u skladu sa odredbama ovog Zakona.
- (2) Glavnica i kamata na ove obveznice direktno se isplaćuje iz dijela sredstava entiteta i Distrikta sa Jedinstvenog računa Trezora Bosne i Hercegovina. Poseban escronj račun i račun za servisiranje duga po osnovu obveznica stare devizne štednje biće otvoren u Centralnoj banci za ovu svrhu, a Ministarstvo finansija i trezora Bosne i Hercegovine upravljaće njime.
- (3) U skladu sa članom 21. ovog Zakona, uplate na escronj račun i račun za servisiranje duga vršiće se na osnovu otplatnog plana koji će biti pripremljen nakon završetka postupka verifikacije i nakon finalizacije iznosa obveznica.
- (4) Izmirenje obaveza po osnovu računa stare devizne štednje ima isti prioritet kao i izmirenje obaveza po osnovu servisiranja spoljnog duga.
- (5) Za izmirenje obaveza po osnovu računa stare devizne štednje iz stava (2) ovog člana garantuje Bosna i Hercegovina u skladu sa Zakonom o zaduživanju, dugu i garancijama Bosne i Hercegovine.

## **DIO ČETVRTI - PRIMJENA ODREDBA**

### **Član 24.**

Uzajamna prava i obaveze koje proizlaze iz postupka verifikacije, entitetskih ministarstava finansija i Direkcije za finansije Distrikta uređuju se ugovorom sa Agencijama.

### **Član 25.**

- (1) Agencije su dužne da dostavljaju informacije o iznosu računa stare devizne štednje verifikovanih u skladu sa ovim Zakonom entitetskim ministarstvima finansija i Direkciji za finansije Distrikta.
- (2) Entitetska ministarstva finansija i Direkcija za finansije Distrikta, svako u okviru svojih ovlašćenja, dužni su da u svojim glavnim knjigama trezora vode redovnu evidenciju obaveza po osnovu računa stare devizne štednje na osnovu dobijenih informacija iz stava (1) ovog člana.

## **Član 26.**

Entitetske vlade i Skupština Distrikta, odnosno organi koje oni ovlaste, donose propise o sprovođenju postupka verifikacije prema potrebi.

## **DIO PETI - PRELAZNE I ZAVRŠNE ODREDBE**

## **Član 27.**

Izvršne sudske presude po osnovu računa stare devizne štednje sudovi su dužni da dostave entitetskom ministarstvu finansija, odnosno Direkciji za finansije Distrikta.

## **Član 28.**

Sve predmete koji na dan stupanja na snagu ovog Zakona nisu riješeni pravosnažnim odlukama nadležni sud prenosi po službenoj dužnosti na verifikaciju i izmirenje u skladu sa ovim Zakonom.

## **Član 29.**

Entiteti i Distrikt će u roku od 90 dana od dana stupanja na snagu ovog Zakona donijeti svoje propise kojima će detaljnije urediti materiju koja je predmet ovog Zakona.

## **Član 30.**

Ovaj Zakon stupa na snagu narednog dana od dana objavljivanja u "Službenom glasniku BiH".

PS BiH broj 291/06  
13. aprila 2006. godine  
Sarajevo  
Predsjedavajući  
Predstavničkog doma  
Parlamentarne skupštine BiH  
**Martin Raguž**, s. r.

Predsjedavajući

Doma naroda  
Parlamentarne skupštine BiH  
**Mustafa Pamuk**, s. r.